

PERNANDO AMEZKETARRARI GORAZARREA BERE ERRIAN JAIOTZAREN BERREUNGARREN URTEA OSPATZEKO

1964 irailaren 6-an Amezketa Fernando-n omenez jaiak izan ziran. Meza nagusian Juan Maria Lekuona-k sermoia egin zuen. Basarri ta Uztapide bertsoetan aritu ziran. Bazkari aundi bat egin zan kanpoan eta gero itzaldiak Antonio Arrue, Fernando Artola "Bordari" eta Aita Antonio Zavala-k Fernando-n nortasuna gogora ekarriaz.

Bezperan jaiotetxe aurrean jarritako arria agerian ipiñi zan.

BERTSOLARIEN TXAPELKETAK

1964 urtean Euskaltzaindiak bertsolarien txapelketak eratu zituen erririk erri, 1965 urteko lendabiziko egunean bukatzeko Euskalerrri osoko bertsolarien txapelketa nagusiarekin, Donostian, Anoeta-ko frontoian. Aipatu degun azken saioak izugarritzko oiartzuna izan zuen publiko bertsozalearen aurrean. Amar bertsolarik parte artu zuten bertan. Txapelduna Uztapide. Bigarrena Lazkao-txiki. Irugarrena Xalbador. Laugarrena Mitxelena. Bosgarrena Mattin. Seigarrena Lopategi. Eta beste laurak Mugartegi, Narbarte, Arozamena eta Garmendia.

Egin ziran txapelketak auek dira:

Nafarroan:

Beruete-n maiatzaren 3-an Andres Narbarte Goizueta-koa txapeldun.

Lesaka-n garagarrillaren 14-an Migel Arozamena Lesaka-koa txapeldun.

Iruñean irailaren 27-an Nafarroako azken txapelketa nagusia. Andres Narbarte txapeldun eta Migel Arozamena bigarren.

Bizkaian:

Urkiola-n garagarrillaren 13-an Julian Martitegi Mañari-koa txapeldun.

Mungia-n uztailaren 19-an Felix Ortuzar Muxika-koa txapeldun.

Markiña-n, Larruskain-en, uztailaren 31-an Abel Muniategi Ereño-koa txapeldun.

Igorre-n, abuztuaren 16-an, Basilio Pujana Zeanuri-koa txapeldun.

Gernika-n, abuztuaren 17-an, goizean, Bizkaiko txapelketa nagusiaren aurrekoa. Azkenerako gelditu ziran Juan Mugartegi, Jose Maria Arregi, Ireneo Aju-ria, Deunoro Sarduy, Basilio Pujana eta Abel Muniategi. Juan Mugartegi-k irabazi zuen Gernika-ko sari nagusia. Juan Lopategi eta Juan Azpillaga, Bizkaiko txapeldun eta bigarrena, azken saiora, aurrekoetan parte artu gabe, joateko eskubidearekin zeuden.

Ondarru-n, abuztuaren 17-an, arratsaldean, Bizkaiko azken txapelketa nagusia. Juan Lopategi txapeldun eta Juan Mugartegi bigarren.

Gipuzkoan:

Andoain-en, garagarrillaren 21-ean, Domingo Garmendia Berrobi-koa eta Kasiano Ibaguren Lizartza-koa berdin.

Mondragoe-n, garagarrillaren 28-an, Jose Maria Gabilondo Antzuola-koa txapeldun eta Jesus Egileor Alberdi bigarren.

Errenteria-n, uztailaren 23-an, Frantzisko Etxeberria Lasarte-koa txapeldun eta Kosme Lizaso Oiartzun-goa bigarren.

Azkoiti-n, abuztuaren 9-an, Manuel Olaizola Arroa-koa, Uztapide-n illoba, txapeldun eta Pedro Aizpurua "Lilibere" Zestoa-koa bigarren.

Beasain-en, iraillaren 20-an, Jose Intxausti Segura-koa txapeldun eta Jose Antonio Aranzadi, Ezkio-koa bigarren.

Zarautz-en, azaroaren 15-ean, Jose Maria Lertxundi Aya-koa txapeldun eta Jose Maria Roteta Aya-koa bigarren.

Eibarren, abenduaren 6-an, Gipuzkoako txapelketa nagusiaren aurrekoa. Aurreko txapelketetan txapeldun eta bigarren gelditutakoak parte artu zuten. Jose Maria Roteta ezin joan izan zan desgrazi bategatik eta bere ordeaz Markos Manterola joan zan. Gaiñera Joakin Mitxelena eta Jose Migel Iztueta "Lazkao-txiki" ere sartu ziran. Azkenerako gelditu ziranak dira: Lazkao-txiki —Eibar-ko kopa irabazi zuen—, Garmendia, Mitxelena, Intxausti, Etxeberria, Ibaguren, Lizaso eta Lertxundi.

Tolosa-n, abenduaren 13-an, Gipuzkoako azken txapelketa nagusia. Jose Migel Iztueta "Lazkao-txiki" txapeldun. Domingo Garmendia bigarren. Eta Joakin Mitxelena irugarren. Irurak Euskalerriko txapelketan parte artzeko gelditu ziran.

Bilbon:

Capitol-ean, abenduaren 20-an, Euskalerra osoko azken txapelketa nagusiaren aurrekoa. Guztiak pasatu ziran azkenekora. Jose Migel Iztueta, Joakin Mitxelena, Domingo Garmendia, Fernando Aire "Xalbador", Mattin Trecou, Andres Narbarte, Migel Arozamena, Juan Lopategi eta Juan Mugartegi. Bizkaiko Diputazioaren kopa "Lazkao-txiki"-k irabazi zuen eta Bizkaiko Aharro Kaxarena Joakin Mitxelena-k. Manuel Olaizola "Uztapide" eta Iñazio Eizmendi "Basarri"-k eskubidea zuten Euskalerriko azken txapelketa nagusira joateko besteetan parte artu gabe. Basarri etzan joan.

BIZKAIKO NESKA MUTILLEN EUSKAL ESAMIÑAK

1964 garagarrillaren 11-an, aurreko urteetan bezela, Indautxu-ko Aita Jesuiten kolejoan Bizkaiko neska mutilen esamiñak egin ziran. Sariak 1964 abenduaren 20-an eman ziran Capitol-ean egin zan bertsolarien txapelketan.